

Prome Minister Eman ta enfatisa:

Prima di AZV pa empleado y pensionadonan ta baha ora cu BAZV subi

O R A N J E S T A D (AAN): Manera por corda, prome cu votacion pa aproba presupuesto 2015, e fraccion di AVP a presenta un amienda, unda ta pidi pa haci un cambio den e porcentahe cu ta cobra na "health tax". Esaki ta e impuesto cu ta wordo cobra pa wordo hinca den e fondo di AZV. Aunke cu el a wordo aproba den Parlamento, tin un procedura cu mester wordo cana ainda.

Den combersacion cu Prome Minister Mike Eman, el a recorda cu fraccion di AVP a presenta un ambiente unda kier a introduci un ahuste di 1% den e BAZV y e



reduccion di 1% di e prima di AZV. Pa Gobierno esaki lo a nifica un 20 miyon florin extra na entrada den 2015 y 45 miyon extra pa otro aña. "E reduccion di prima di AZV ta un alivio

pa esnan cu ta paga e prima, cu ta e empleado- y pensionadonan."

Den calculacionnan haci, ta mostra cu probablemente e efectonan lo no ta hopi grandi, pasobra e aumento di 1% di BAZV ta wordo compensa cu e reduccion di 1% den e prima di AZV. Pa Gobierno si e ta un entrada adicional, pasobra e grupo cu ta bay paga e BAZV ta hopi mas grandi, pasobra e ta inclui turistanan, ya cu via cada compra cu haci un contribucion ta bay pa AZV. "Nos a pensa cu e paso aki tabata uno positivo pa e fondo cu Gobierno mester contribui na AZV. Y

na mesun momento ta tene cuenta cu no ta un ahuste cu ta haci sin tene cuenta cu e poder di compra." Tempo di BBO, el a recorda, a wordo bisa cu ta baha e impuestonan directo pa di e forma aki compensa e inflacion cu BBO ta crea, pero a lubida cu tin un grupo hopi grandi di personanan cu salario hopi abou cu no ta paga impuestonan directo. "Esaki ta nifica cu na momento cu reduci impuestonan directo, no ta compensa nan realmente y esey ta e efecto cu nos a mira na 2007, un perdida di poder di compra hopi grandi. Nos a mira esey cu hopi inkietud e tempo ey, pesey nos a escoge pa un reduccion di prima cu un porciento cual ta traha directamente na fabor di esnan cu ta paga prima, cu ta e empleadonan y pensionadonan," Prome Minister Eman a splica.

Mientrastanto, e ley ta canando su caminda y por a compronde cu e ta na Raad van Advies. Prome Minister Eman ta spera cu e por yega Parlamento lihe y haya un apoyo grandi "ya cu e ta hopi importante pa e sostenibilidad na e fondo di AZV y finanzas publico, mientras cu e tin recursonan adicional pa presupuesto 2015 y 2016, mientras cu e tin e impacto riba e forma cu e ta wordo introduci. Esaki pasobra e ta tene cuenta cu e poder di compra di e ciudadanonan no wordo afecta di forma negativo, pasobra e tin un compensacion cu reduccion di e prima." Si e ley aki cana lihe, e lo por wordo introduci den e di dos mita di 2015. Prome Minister ta spera cu den practica e compensacionnan aki lo sali den un presupuesto balansa.